



Valentinianus filius fuit Gratiani hominis ignobilis apud Cibalas in Pannonia ortus. huius pater Funarius appellatus est, eo quod uenalitium funem portati quinque milites extorquere nequirent. Hunc autem & huiusmodi præclaros homines in Pannonia ortos ideo huic operi inferere uoluimus, quod ea regio Germaniæ à plerisque attributa, aut saltem contermina semper extiterit. Nam proculdubio priusquam Romani in ea loca Colouias duxissent, indigenæ Germani fuerunt. Postquam autem sua arma alpibus superatis ad Danubium usque extenderunt, atque Germanis expulsis, in Rhetia, Vindelicia, Norico. Pannonia superiori & inferiori nouas Colonias duxissent, & præfectos limitum constituissent, in primis etiam suam linguam introducere studuerunt. Id quod etiam eos in Gallia, præsertim circa Rheni ripam, fecisse constat. Semper tamen quidam ex Germanis Romanorum Colonis commixti, ibidem permanserunt. Taceo iam aliquoties integras Germanorum cohortes, Romanorum castra secutas, quæ sub ipsis stipendia meruerunt, atque suis Germanis propinqui, in prouincijs Romanorum confederunt. Donec tandem Gothi, Vandali, Boij, Sueui, Franci, Auares, & Hunni ex mediterraneis Germaniæ locis erumpentes, Romanos profligarunt ac denuò auita loca occuparunt, quæ etiamnum possident. Nam Rhetia, Vindelicia, Noricum, Pannonia inferior & superior, hodie Curientes Sueui, Tyrolenses, Bauari, Austriaci, Carni, Stiri, & Hungari existunt, qui magna parte Germanis principibus obediunt, & Germanorum lingua utuntur. Quanquam Germani tandem sub Heinricis & Ottonibus Hungaris ob commercium belli, & Christianam religionem professam, partem Pannoniæ inferioris concesserunt, qui licet Slauorum lingua utantur, tamen plurimos Germanorum mixtim apud se habitantes, pro suis agnoscunt. id quod in Septem castrensibus patere arbitror. Itaque non dubito, quin Maximinus, Philippus, Decius, Iouianus, Valentinianus, Gratianus, Imperatores, & S. Hieronymus, in Pannonia nati & educati, aliquæ linguæ Germanicæ usum habuerint, aut moribus suis Germanos propinquos retulerint, id quod haud obscure apud auctores cernitur, dum illis Barbarorum idioma & mores attribuerunt.